



ՎԵՀԱՓԱՌԻ ՀԱՅՐԱՊԵՏԻ ՔԱՐՈՋԸ
ՓՐԿՉԻ ՀՐԱՇԱՓԱՌԻ ՍՈՒՐԲ ՀԱՐՈՒԹՅԱՆ ՏՈՆԻ ԱՌԹԻՎ
ՄԱՅՐ ՏԱԾԱՐՈՒՄ
(1981 թ. ապրիլի 19)

«Ես իսկ եմ յարութիւն եւ կեանք. որ հաւատայ,
թէպէտ և մեռանի՝ կեցցե» (Յովհ. ԺԱ. 25):

Սիրելի հավատացյալներ, «Քրիստոս յարեալ ի մեռելոց»:

Զատկական լուսավոր այս օրերին, Փրկչին՝ մեր Քրիստոսի Հարության ավետիսը, հոգեպէս միավորում է համայն քրիստոնյա աշխարհը, վկայելու համար միևնույն հավատքը և փառաբանելու հրաշքը աշխարհաստան, երկրպագելով սուրբ խաչի առաջ, որ խորհրդանշում է մահը և անմահությունը Որդվույն Աստուծո:

Հիսուս մեռավ խաչափայտի վրա, աշխարհի վիշտն ու մեղքը Իր վրա վերցրած, բայց և «յարեալ ի մեռելոց» հաղթելով որոգայթը մեղքի ու չարիքի:

Ու «մահը կոպ գնաց յաղթութեան», ինչպէս պիտի բացականչէր Պողոս առաքյալ:

Աստվածային փրկագործության ամբողջ տնտեսությունը հիմնված է Հիսուսի խաչելության և հարության ճշմարտության վրա: Սուրբ խաչը մահից դէպի կյանք տանող կամուրջը հանդիսացաւ: Տառապանքի ու մահվան

գործիքը դարձավ ճանապարհ փրկության, ճանապարհ հավերժական կյանքի: Հիսուս իր զոհաբերումով և մահվան դեմ իր հաղթությամբ, փրկագործ իր կնիքը դրոշմեց այս ճշմարտության վրա:

Ահա թե ինչու Պետրոս առաքյալ ցնծում է՝ «Յրեկեալ է Աստուած և Հայր Տեառն մերոյ Յիսուսի Քրիստոսի, որ ըստ բազում ողորմութեան իւրում ծնաւ զմեզ վերստին ի յոյսն կենդանի, ի ձեռն յարութեան Յիսուսի Քրիստոսի» (Ա. Պետրոս Ա. 3):

«Յոյսը կենդանի», ահա այն անմար կանթեղը որ լուսավորում է մեր հավատքը, որ մխիթարում է մեր հոգիները, որ պաշտառակերպում է մեր երկրային կյանքն ու մեր ձեռաց գործերը, որ մղում է տալիս մեր կամքին՝ գործելու ինչ որ բարի է, ինչ որ արդար է, ինչ որ ճշմարիտ է: Մեր հավատքով և մեր բարի գործերով է որ մեզանից ամեն մեկը պիտի կարողանա վառ պահել կանթեղը իր կյանքի կենդանի հույսի, կանթեղը հավիտեական կյանքի հույսի:

Ահա այսօր մեր ուրախությունը, ահա մեր բերկրանքը, երբ մեր սուրբ Եկեղեցին բերում է մեզ մեծագույնը բոլոր ավետիսների, ավետիսը թե՛ «չարեաւ Քրիստոս ի մեռելոց»: «Զի եթէ տնկակից եղեալ նմանութեան մահու մորա, ալև յարութեան մորա լինիջիմք» (Հռոմ. Զ. 5):

Սիրելի հավատացյալներ, Հիսուսի Հարության ամեն ավետիս մահ հրավեր է մեզ բոլորիս ուղղյալ, որ մեր հոգիները զարդարենք բարի գործերով և եղբայրական սիրով դեպի մեր նմանները բոլոր, հեռու մնալով չար խորհուրդներից, թշնամաբեքներից ու եռակեցտրոն մղումներից և պես-պես մեղքերից, որոնք վտանգում են, մուլնիսկ քանդում՝ մեր հոգիները դեպի փրկություն տանող կամուրջը:

Բազում են որոգայթները չարի, բազում են փորձությունները, որոնք շրջապատում են մեզ մեր կյանքի ճանապարհին, երբեմն խաբեությամբ, երբեմն հրապուրանքներով, երբեմն բռնությամբ: Մեր տկարություններով ու մեր մեղքերով հաճախ մեղանշում ենք Աստուծո դեմ, մեր սեփական մարմնի ու հոգու դեմ, մեր ընտանիքի ու մեր նմանների դեմ, մեր ժողովրդի ու մեր հայրենիքի նկատմամբ:

«Ո՛վ իցէ մարդ որ կեցցէ և ոչ մեղիցէ»: Այո՛, սակայն մարդու կոչումն ու փառքն է, որ իր ազատ կամքով հաղթահարի իր տկարությունները, քափի իր մեղքերը, պաշտառակերպի ինքն իրեն և բարի գործերով արդարանա աստվածային դատաստանի առջև, արդարանա հասարակության և իր սեփական խղճի դատաստանի առջև:

Հավատքով ու բարի գործերով արդարանալու ճանապարհին, մարդկանց գերագույն առհավատչյան Հիսուսի Հարության ստուգությունն է: Զի «եթէ Քրիստոս չիցէ յարուցեալ, ընդունայն է քարոզութիւնն մեր, ընդունայն են հաւատքն ձեր», արդարացի կերպով վկայում է Պողոս առաքյալը:

Արդ, մեր Փրկչի Հիսուսի մահվան ու Հարության մեծ խորհուրդը ձեր սրտերում ծրարած, ապրեցեք ու գործեցեք՝ մնալով միշտ հավատարիմ սուրբ Ավետարանի պատգամներին, քրիստոնեական մարդասիրական բարոյականին, մեր առաքելական Մայր Եկեղեցու հոգեշնչով ավանդներին:

Եվ մանավանդ, ի տես աշխարհում խոնրվող ազգամիջյան հակամարտությունների և սպառազինումների սանձարձակ վազքի, որոնք մեծագույն չարիքներն են հանդիսանում մեր օրերում, մենք հայերս, իբրև Եկեղեցի ու ժողովուրդ, աղոթենք ու գործենք վասն խաղաղ համակեցության երկրագնդի բոլոր ազգությունների, վասն համերաշխ գործակցության բոլոր մեծ ու փո-

քըր պետությունների, վասն խափանման ռազմատենչ ոգու և վասն իսպառ խորտակման մահվան գործիքների:

Մենք, իբրև Հայրապետը Հայոց, ծանրորեն մտահոգ և խորապես գիտակից որ համաշխարհային փոթորկումների ժամանակ մահացու հարված են ստանում առավելապես փոքր ժողովուրդները, ինչպես այդ պատահել է մեր ազգի պատմության ընթացքում, Մեր պաղատանքն ու աղոթքն ենք վերառաքում առ Տերն մեր Հիսուս Քրիստոս, Իշխանը Խաղաղության, որ ողորմի համայն աշխարհի ժողովուրդներին, ողորմի մեր բազմաշարձար ազգին, ողորմի մեր վերածնված ու ծաղկող հայրենիքին, և Իր կենարար խաղաղության շունչը իջեցնի պետությունների պատասխանատու ղեկավարների հոգիների ու սրտերի մեջ, արգելակելու համար սանձազերծումը չար ուժերի և ամրացնելու հիմքերը ազգությունների խաղաղ գոյակցության:

Խաղաղության շեփորումով սկիզբ առավ մահվան անդունդի եզրին հասած ու ավերակի վերածված մեր մայր հայրենիքի փրկությունը և վերաշինությունը, խաղաղության իրավիճակում մեր եղբայր ազգությունների մեծ ընտանիքում, վերջին վաթսուն տարիներին մեր երկիրը հզորացավ ու ծաղկեց անմախք թափով՝ իր տնտեսությամբ, իր քաղաքաշինությամբ և իր ազգային մշակույթով: Խաղաղության պայմաններում վերջին տասնամյակներին Հայաստանում վերաշինվեցին և բարեզարդվեցին Մայր Աթոռ Սուրբ Էջմիածինն ու շատ վանքեր և եկեղեցիներ, կազմակերպվեց ու լայնորեն զարգացավ կրոնական կյանքը:

Կայուն ու հարատև խաղաղության պահպանումը միայն կարող են ապահովել մեր ժողովրդի ու հայրենիքի հետագա էլ ավելի զարգացումը և կենսագործումը մեր ազգային բոլոր երազանքների:

Արդ, Մենք ծնկաչոք աղոթում ենք՝ «Խաղաղութիւն հեռատրաց, խաղաղութիւն մերձատրաց, խաղաղութիւն ամենեցուն»: Աղոթում ենք մեր ժողովրդի ու հայրենիքի էլ ավելի պայծառ ապագայի համար, մշտադառն խաղաղության ու անվտանգության պայմաններում:

Այո՛, հայ ժողովրդի և հայ հայրենիքի անվտանգ գոյատևման ու հարաճուն հառաջդիմության գերագույն երաշխիքն է՝ ամրապնդումը խաղաղության ամբողջ աշխարհում և մեր վերածնված երկրի սահմանների վրա:

Սիրելի հավատացյալներ, այս խոհերով ու սպասումներով ողջունում ենք այսօր ավետիսը մեր Փրկչի Հիսուսի Քրիստոսի Հարության և մաղթում, որ նրա շնորհները և օրհնությունները առատապես բաշխվեն ձեզ բոլորիդ, որ ապրում եք ի Հայաստան և ի սփյուռս աշխարհի: Մաղթում ենք, որ դուք բոլորդ մնաք «լուսոյ որդիներ», հավատարիմ զավակները մեր առաքելական Մայր Եկեղեցու և Սուրբ Էջմիածնի ու միշտ պատրաստ լինեք գործելու ինչ որ բարի է, ինչ որ արդար է ու ինչ որ ճշմարիտ:

«Քրիստոս յարեալ ի մեռելոց, մահուամբ զմահ կոխեաց և յարութեամբն իրով մեզ զկեանս պարգևեաց». ամեն:

